

Úrskurður nr. 4/2019

Í máli þessu var deilt um tollflokkun og gjaldskyldu á fæðubótarefni sem gert er úr kaffi, tvenns konar amínósýrum, koffíni, kólíni, grænu tei, steinefni auk efnasambandanna DMHA og PEA sem eiga að hafa heilsufarslegan ávinning. Varan er í duftformi og neytandi blandar henni í heitt vatn til að gera tilbúinn drykk sem bragðast eins og kaffi. Hin kærða ákvörðun Tollstjóra kvað á um að varan skyldi flokkast í tollskrárnúmer 2106.9020, sem „tilreidd drykkjarvöruefni sem innihalda prótein og/eða önnur næringarefni, einnig vítamín, steinefni, jurtatrefjar, fjölómettaðar fitusýrur og bragðefni og innihalda minna en 50% af mjólkurafurðum,“ en kærandi taldi vöruna eiga að vera í tollskrárnúmeri 2106.9066, fæðubótarefni, ótalin annars staðar í tollskrá.

Þrátt fyrir mótbárur kæranda þess efnis að varan innihéldi hvorki vítamín né næringarefni taldi Tollstjóri ljóst vera að varan innihéldi næringarefni enda væri varan gerð úr kaffibaunum og inniheldur m.a. kólín og steinefni. Að mati Tollstjóra var vöru kæranda því réttilega lýst í tollskrárnúmeri 2106.9020 enda væri varan tilreitt drykkjarvöruefni sem innihéldi næringarefni og minna en 50% af mjólkurafurðum. Þar sem vörunni væri lýst nákvæmlega í tollskrárnúmeri 2106.9020 þyrfti ekki að líta til safnákvæðis tollskrárnúmers 2106.9066 enda væri það númer fyrir vörur sem væru ótaldar annars staðar í tollskrá.

Að ofangreindu virtu var ákvörðun Tollstjóra um tollflokkun og gjaldskyldu staðfest.